

梁

園

歸

權

錄

梁園歸權錄

余染疴懷歸賦畱別詩至次年嬾處行間有塗抹附綴焉前此之作因疎嬾不自收拾俱已散軼烟雲變滅亦姑聽之後此尙待興來也今自畱別詩始故以歸權名

詠懷

拋卻魚須縮蒯緌蕭然席帽大梁游忝參嚴武賓僚末  
虛負揚雄問字儔巨浪拍天星海濶寒煙迷野吹臺秋  
牕前猶是樊樓月有意來供宛轉愁

其二

南郭平蕪地幾弓講堂小駐領祠同隄添雜樹周遭綠  
庭苗戎葵次第紅作客杜陵惟對月懷人張翰或因風  
江湖略識挈音趣鼓柁猶能趁短篷

畱別諸君子

無能燭武年垂老多病休文帶減圍踪跡大綱僧退院  
情懷同調馬銜鞵宦塗刵缺羞看鏡書篋縱橫不療饑  
多謝羣公頻折節可知園吏久忘機

別搗堂

同心異地得來難雅託緇衣賦授餐人說荊州偏暱粲

古來東野但隨韓青雲有路君頻止白髮無情我亦安  
一事請公推物理秋蟬最惜綠陰殘

庭樹

來時庭樹短隨肩此日捎雲又拂烟物色嶒嶸寧厄閉  
歲華荏苒孰加鞭廉頗昔尙強能飯陶令今惟醉欲眠  
坎止流行何復恠但須陶寫借絲弦

減飯

維摩一榻歎支離每對槃餐懶下匙香氣但憑雙柱奏  
老饕無復左車隨恰如宣聖聞韶日還似南陽輔蜀時  
誰是十全扶劣手好煩一劑達心脾

示院中諸生

絳帷謬執駢剛耳細管疇分采鳳毛不憚瑕疵勤拂拭  
幾回點竄費嘲嘈師經組練三軍壯艾利鍼砭二豎逃  
此後政須齊努力因循最足誤青袍

其二

青袍豈肯誤儒林只要堅盟夙夜心去日苦多非草草  
三年比及太駸駸從前已誤蕉迷鹿此後當期冷躍金  
莫道賞音猶寂寞一生珍重伯牙琴

寄知不足齋主人

時蒙 恩賜舉人

衰翁與世久相忘 天語傳來姓氏香自分羽陵隨蠹

老敢希天祿借藜光  
冥搜不惜丹鉛憊  
老健寧愁鬢髮蒼  
莫羨諸郎通桂籍  
殊榮應比伏生強  
君開三徑我羊求  
風雨蕭齋與較讐  
一自濫竽趨一禁  
闔幾回清夢繞滄洲  
尺書迢遞無鴻翼  
踪跡飄零少菟裘  
卻盼秋風決歸計  
好分烟水狎羣鷗

諸方伯餽河鯉

庖丁轅釜尙流聲  
捧到修鱗尾不頽  
豈有遠人傳尺素  
愧無賢胤錫嘉名  
畜經東里空前度  
來溯龍門問幾程  
記得前朝誇宋嫂  
總宜船裏進新羹

夔村石相傳近吳宮  
所出琢爲硯舊者佳  
汪君得

一索賦

響屨風流迹已陳  
吳宮麋鹿總成塵  
惟餘一片蒼皮石  
要奪端溪水洞春

賦得已秋復願夏

郭景純游仙詩句

屋角西風已颯然  
不知殘暑去誰邊  
平添庾亮南樓興  
省卻淵明北牖眠  
夜冷豈知非是雨  
日長安得再如年  
流光容易拋人去  
又似星娥隔歲緣

畫鶯

輕烟漠漠淡於塵  
百轉流鶯弄舌新  
已把春光收拾去  
又來驚醒玉樓人

畫貓

花陰閒臥小於菟日煖風薰一事無鼠輩近來狼藉甚  
主人莫道不相須

費我盤飧頓頓魚任他穿屋又翻書昨宵閒過村西社  
眼見蒙師正類渠

爲三女畫白鳳南鄉子詞

振羽五雲邊翠翮紅衿彩色鮮一自虞廷儀舞後翩翩  
遠去仙山不可攀 昨到墨池前體素無塵玉質妍料  
得繁華都脫盡翛然好伴瑤臺縞袂仙

重陽後連日苦雨



底事天公慣作魔重陽過了雨偏多泥深繡市無行轍

宋時開封府治之前極繁盛謂之錦繡街河挾狂飈有怒波霜降前後河勢尤大濕已

侵牀難就枕漏將穿屋欲披蓑繁臺明月行將別暫乞清光照綠蘿

喜晤汪鑒可

相逢蒼髯兩蕭蕭客裏流光掣電消每指晨星懷舊雨不圖會面有今朝夷門柳色還相戀湖上晴雲久見招君自來游吾自去天涯苦憶又迢迢

題童梧岡鄭雲門吳蓉塘黃小華嚴愛庭茅耕亭

汪雲壑七君書扇

風流羣雅總疑仙  
雪影泥香跡未湮  
一笑略如天寶後  
琵琶畱得李龜年

春明舊夢憶衰翁  
聚散升沈致不同  
惆悵三天七才子

一齊木葉舞西風

七君皆直上書房  
三天書房舊額也

停琴竚月圖

輕颺扇纖柯  
落葉紛已積  
美人抱微尙  
寒袂警瑤席  
促膝橫素琴  
冷坐倚文石  
欲待蟾妃來  
幽懷寄脈脈  
天濶淡無雲  
一望翠宇碧  
月來疑有情  
月去清輝隔  
抱琴還入房  
露下中庭白

摸魚兒

楊菱洲椿萱並茂圖

更幾番剪碧裁紅春韶纔逗花信東皇作意添芳思點  
綴幽窗風韻心自付算花艸爭妍總是閒脂粉華堂日  
永有雲護靈椿露凝萱草蘭玉況交映功名事露得

君恩一命華年尤喜方盛板輿迎養渾閒事難得玉  
卮雙進君且省還是懷州妒殺河陽令除書到近看  
綵舞春風琴揮夜月新綰小侯印

重賦大梁畱別

因循重隔一年秋陌上浮雲變未休棋局已輸難復斂  
布帆無恙且輕收秫田未辦陶元亮下澤長懷馬少游  
試向大堤看柳色西風殘照不勝愁

彝山寧肯作菟裘馬滑霜濃去亦休山向吾曹常北顧  
水知人意只東流柳枝到處都堪折硯稅無多亦易求  
短後長筵吾已辦晴簷啼鳥莫相留

黃河舟次

三晨已達江南境水面渾如鏡面銅河伯早迴千尺浪  
大王還借一帆風望來吳會雲猶遠聞說星源路可通  
卻怪步兵歸去櫂蓴鱸江上不英雄

蓬櫳撫枕溯流光竿木時逢戲幾場素壁有瑕憐靖節  
香奩無故累冬郎纔經夢雨花偏落早見晨風翼已翔  
自分平生多局促極天雲樹太飛揚

念奴嬌 黃河舟次再賦

昆侖東下接滄溟，盪破一天蒼壁。蔓壑支流，千萬派，總入怒濤狂涌。遙溯星源，近連北固，獨遠長安日。烟沈欲暝，詩人一舸孤絕。堪憐八十衰翁，昔年綠鬢，換了星星雪。指笏垂綸，隨分事於我，兩無交涉。心迹蓬飛，功名鷁退，身世都難說。浩然歸去，不知何處堪歇。

潘榕臯同年招飲卻謝

梅花已破風前萼，竹葉難分雪後春。不是衰慵成傲慢，久嫌禮數敝精神。花橋近接春風宇，洛社應添末座人。此後相期成二老，支筇莫厭往來頻。

君住花橋巷

梅岑索題雙魚圖

石首魚一 鮓魚一

江南寒凍未全開  
早被東風著意催  
海上江梅纔破萼  
冰鮮已進福山來

梁園長缺客頻彈  
剩有山廚苜蓿餐  
何意歸來剛十日  
黃琮蒼壁並登盤

又題畫小鳥俗呼核桃雀  
喜食核桃人以此飼之  
熟則馴狎縱令飛去  
以桃引之則飛回並能作拳  
旗汲水諸戲

緡蠻記否咏葩經  
人性爭如物性靈  
啄粟拳旗都解意  
不徒碎語枕函聽

妙手王郎巧入神偶圖小鳥活如真不知棲息幽巖裏  
飲啄能如腕下春

水仙子

小令方竹堂秋林淪茗圖

撼梧桐滿樹商聲綻秋花滿地黃金攪詩腸渴盡吟邊  
吻撥活火碾香塵童兒解事慢添薪老鶴衝煙避竹爐  
蟹眼生病相如得賜金莖

又

竹堂小照失去多時復得於京師故此闕述之

顧長康妙畫通靈古延平劍合龍津華表上重來丁令  
長安市埋沒烟雲也似我半世飄零畫猶然舊日衰人  
不似年前俊費幾番掩卷銷凝

又 潘榕皋桐江竹枝圖

輕橈搖曳蕩春江翠袖低迷駐曉艫比平江添了溫磨  
樣看笑容水面粧點染就山香水香薄日嫌明蘭舟怕  
駛愁絕潘郎

人月圓

小令 潘功甫郊居集後

分明金馬門前客底事賦郊居謝家池上鳳歌鸞舞又  
見新雛 酒邊花下情來撥觸筆效前驅思如雪豔摛  
詞琢玉霏唾傾珠

水仙子

小令 歸佩珊填詞圖後

緘幽懷雲錦織迴紋修恨譜眉峰損翠痕賦新愁漱玉



詞風韻淡濛濛牕戶陰冷森森不櫛書生裊殘烟銀帛  
冷敲雁柱寶釵分這次第費幾許沈吟

東范芝巖用酬潘榕皋前韻

辭祿早忘金馬貴遂初還領石湖春詩成一一珠無類  
老去亭亭鶴有神息影邱園能勵俗忘機魚鳥也親人  
玉堂舊夢難追憶且把深杯莫厭頻

東趙和伯刺史

伯通橋畔有嘉聲報最欣聞上谷鶯治譜略同冬夏日  
君愛民而執法故以袞盾相比家風原與鶴琴清重逢似續春明夢感  
舊彌敦兩世情廩粟頻勞從事遞何須乞米效真卿君惠

米白

水仙子 量愁寄友

若量愁一斛整無零我與若平分兩不贏都釀成各自  
悲涼境問天公何心持贈這根荻蔓引絲縈對殘編添  
黯黯臨皓月忒盈盈難迴避華髮星星

相國寺□□上人惠藜杖

無復榮分太乙光一枝鄭重出雲房攜來尙帶烟霞氣  
入手猶聞薝蔔香硯北每隨童侍側橋東時與客扶將  
從茲欲動看雲興添个良朋笠屐旁

王孺子殉親議

或問於舊史氏曰王孺子之以死殉其親也可謂孝乎  
曰烈矣烏足以言孝哉然則旌之者非歟曰旌者朝廷  
之令甲也有例焉循乎例則得旌否則雖純孝不得邀  
今請循乎例則旌之云爾然則奚爲其不足於孝乎夫  
孝以守身爲大至髮膚且不敢毀傷焉而忍戕其身以  
殉親乎夫孺子之父死於忿也怨毒之於人甚矣憤不  
得雪官不爲理計惟有復仇之一說焉古之人有行之  
者曰伺其仇乘間得甘心焉或手及其頭或口飲其血  
快然於心乃自投獄待罪不敢苟活自比於亂民焉今  
孺子之死能使其父之忿有得伸而怨有得雪乎忿得

伸怨得雪則雖以死殉而孺子之心安矣死父之心亦  
可快然無憾矣乎今孺子之忿小忿也怨亦私怨也雖  
愬之有司不足以置之死地而徒令怨家仇人側目談  
笑而視其父若子之死若秦越人之不相值也亦何益  
哉夫人而至於自戕且父子之二命相繼若執法以嚴  
鞠其狀卽科其怨家仇人以應得之罪而論抵焉未爲  
過也而有司者顛預而不之及徒以一旌塞其責而其  
父之死又將何說以處之乎幸有素之目擊其事而噉  
噉於公廷也使無其噉噉不已則并此祠可不建而閭  
可不式也夫立祠非漫然也在祀典則建之非然者不

得建也孺子之私祠可建若官爲之舉其事則不可也  
然則祠而旌之者徒以有素在也若素者孝養其親而  
調護其弟若姪使之荷 天家之榮寵垂令問於無  
窮貞孝之稱固不虛哉

王浩吳縣吏受辱於本官之僕自經死子如松年十  
四見父死亦闔戶自經王素者浩姊也以許字非偶  
矢不嫁終事其親兼撫其弟姪比浩父子死爲訟於  
官乃得以狀聞於 朝徇素之請也

楊漱石許置小屋不果

林鴉不肯早綢繆老去翻愁返故邱三徑但招鷗作伴

一巢誰望鵲爲謀西湖空有菟裘想歸橐難盈舩舫  
回首春明成昔夢君方落拓我歸休

汪心農試硯圖

早向端溪訂石交一丸珍比紫瓊瑤晴窗自寫浮溪集  
知費參差幾葉蕉

不問鸚之與鴒之雙矚炯炯見青時菊香膏好經初試  
定有蒼龍起墨池

宋陳公密知端州得硯曰蒼龍橫沼菊香膏心農自製墨

水仙子

孫

鑿翠軒

法華山落木蕭蕭西溪路烟水迢迢鑿翠軒田廬小小  
空襲了舊時名號望前人鶴去難招也沒有房櫳窈窕

也沒有酒釀花嬌憑來了大手揮毫

折桂令

汪心農守梅山館

孤山放鶴人遐問何日招它來伴梅花怕月冷苔荒風  
饕雪虐滅卻穠華啄莓苔掩映橫斜刷霜毛獨立晴沙  
春在天涯人在天涯菜把誰供詩句誰誇

踏莎行

周忠毅玉印印文季候二字公表字也其  
後人得於粵中

苔繡銷紅土花凝碧盤螭細篆文猶濕蠻烟蜚雨任摧  
殘百年呵護疑神力 臺諫風清靈均字潔銅符鐵券  
多漸滅煌煌陳列鼎彝旁尋常杯棬無顏色

虞山陸大

京鎬

僧衣小照

這和尚已證涅槃畱鬚眉於儀象豎一指以悟禪超兩  
界而孤往啟三乘之祕鑰陋四相之謬妄妙五蘊以皆  
空淨六塵之擾攘壽七十以示寂臨八月而用壯魂九  
天而難招少十全之醫匠嘆昔年曾現宰官身此日空  
畱長老相是爲琴川陸大兄之遺像

八十生日

浮生八十眨眼到瞥似晨風下晴昊玉堂無意一躋攀  
回首三山隔瑤島歸來道路任悠悠老去勞人徒艸艸  
當年儕輩盛簪裾已隨落葉秋庭掃而我頽唐且塊然  
欲逐貧難卻添老庸才自比不材榕買買幾同在襤蚤



頑健猶能書細字筋骸不肯同枯槁今朝初度攬揆辰  
卻讓坡公一日早人誇大耋杖朝榮可憐雨絕天門曉  
多謝羣公愛我深春酒猶嫌三爵少況兼天意劇相憐  
晴旭挂檐梅萼小寒泉且酌玉局翁金尊重與諸公倒

李心菴農部惠小杖

三尺烏筠杖殷勤寄意長入門還授几接坐細籌方君  
子原堪倚仙人澤未亡從茲好扶劣不借赤藤光

水仙子

小令

唐陶山觀察松風琴韻小照

怪三吳雨露偏濃聽泠泠指下枯桐暢幽懷自結松風  
夢分明一個詩翁渾忘了朱幡威重短簿祠野人歌伯

通橋與人誦都說是宰相山中

又 龔定菴湖樓吹笛圖

淡溶溶雲淨水明樓風瑟瑟湖平一鏡秋翠生生韻遞  
朱櫻口哀怨玉龍愁怕濕透春衫袖蘭陵水面舟黃鶴  
磯頭酒猛憶得昔年游

滿江紅 岳忠武銅印

半壁東南疇整頓靖康刈缺計惟有精忠心印指麾豪  
傑士卒奉符爭効命蒼生安堵忘鋒鏑恨雙環腦後沒  
人提空悲切 金人犯偏猖獗金牌召何倉卒歎出師  
未捷滿衿清血往事難平三字獄忠魂猶戀西湖月剩

離離斗大篆文新難磨滅

福孫小傳

福孫余大兒誠然子也誠然隨余畱京師廢書後習懋遷頗能治生有火伴挾二千金而逃誠然素有羸疾至是益憤恚疾勢尤劇閱數月偵得踪跡獲而訟於官按律科罪固不輕誠然不欲辨請於司寇竟寢其獄次年乃生福或謂一念之仁所致也誠然疾終不可救竟歿福少孤失學近始習制義未成篇也又喜學詩塾課外恒自作詩使假以年或可望晚成今以疾死於庸醫之手年僅十八余哭之慟乃檢其箱篋皆書冊詩文筆墨

外此無些子童稚玩弄之具乃益悲夫一念之仁乃得有子天道之近也誠然死而嗣未絕也閱十八年而福死則其嗣絕矣十八年而嗣絕則不如早絕之矣余無狀且老可死者也福固不可死也不予死而福死將謂緩予死耶嗚呼使予見誠然之死而又見其嗣之絕則福之死殆將以促予也已

爆竹和潘榕皋韻

結束千重紙喧匝萬井雷明催殘臘去暗逐好春迴坐客頻遺箸園花欲落梅東鄰轟禱祀北舍聚童孩逐疫儼同壯延釐福自皆百蟲疑振蟄羣卉競萌胎響有雙

聲應鞭還一串排明朝看賽月天上夜珠來

龔闇齋觀察舟中茶話

平生慣識江湖趣欲聽挈音久未曾今日吳船成小坐  
恍疑吹笛到松陵

茗芽初剖綠筠封鄉味應爭日鑄濃老我愧非明略客  
卻煩手點蜜雲龍

屬疾

學養支離德未全歲華捷似箭離弦浮漚乍結玼珠質  
散木徒虛匠石年老病難圖經世業家貧勉受故人憐  
竭來未忍拋書卷要結來生蠹簡緣

蓮蓬人二首

分明八水會中人四相全離遇以神通直自含君子德  
痾瘦忽現丈人身早含苦蕙芳心在未斷情絲此日因  
何處尙堪陪杖履濂溪宅畔獨畱塵

荷衣只合伴騷人老態支離劇有神蹤蹟難忘鷗鷺侶  
情懷還認水雲身拋殘青子畱遺蛻冷落紅香悟夙因  
記取涉江懷遠道綠雲圍繞總如塵

有感

史公門下牛馬走

先帝朝中蟣蝨臣坦率慣居門限上迂疎應笑背匙人

直鉤作釣知何補  
竿木逢場亦有因  
莫道有身成大患  
胸中畱得十分春

折桂令

吳江令李湘浦西亭文燕圖

放朝衙訟簡人閒  
花滿春城驥水江邊  
玉笋傳杯彩毫  
覓句錦字題箋  
一觴一詠修禊事  
林閒羣屐三月三日  
浣花翁水際詩篇  
逸事新傳仙李多賢  
前擬青蓮後數  
龍眠

徐緘齋評古圖

書畫張青父金石趙明誠嗜好物自聚喪志懲紛縈至  
人少凝滯淡泊無畱情譬之太空雲變滅任虧成君今

獨愛古羅列殊縱橫彝鼎雜鞞悅鉛槧連丹青一如五  
雜組焜燿不可名婆婆恣燕賞陪侍如娥姪情專愛又  
博旣癡癖以成卻勝狗馬好略殊聲色撻以茲紹古懷  
幽獨庶自盟猶賢亦足尙區區守平生

徐雲軒秋心菴坐月圖

心上秋來合作愁一庭風物況清幽幽人秋思蟾如覺  
定有天儀降綵輶

欲於天上寄清愁眼底浮雲爛不收坐久不知涼著袂  
清光已過舊紅樓

題唐藏經一紙



裴山方伯云自蜀潼川某寺得之乃唐人書也  
紙色甚舊而墨光黝然其寫經之由與年月俱  
無可攷核率  
書此詩還之

梵筴唐賢蹟祇園蜀郡儲千年祇廟火片羽吉光餘筆

豈循遺教

右軍遺教經歐公  
以爲唐經生書

名偏闕史書

傳是王儼祥  
書體祥亦無

改  
煙雲矜過眼此外不關渠

膝簫樓餉松蘿茶

江南纔及焙茶辰已見頭綱裏綠筠翠剪雲芽猶帶露  
香浮雪椀不沾塵竹符難調中冷水石銚還分白岳春  
仿佛古人重覲面豈徒風調擬佳人

次日復得黃三所寄歙州新茗

相如無復賜金莖肺病年來苦未平黃海煙霞勞夢想  
魏塘迢遞計初程只將沖淡和書味自有旗槍敵酒兵  
午枕一甌風習習漫勞人擬玉川生

寄諸塢堂太守

朵雲飛下古人書鶴料分將慰索居道不諧時從宦拙  
老無生計見交疎清才遠想梁園月廉績能還合浦珠  
聞道四郊承德意欲憑短什問何如

我有詩

余老病杜門無以自遣就所習近各賦一章如  
相贈者物猶如此矧相契之人哉

我有插架書琳琅手未觸寄語得書人無蹈口也續  
我有一縕袍在笥恆自隨豈無新衣新冷暖不相資  
我有端溪石筆秃硯亦韜難以此時逸償渠前日勞  
我有玉琮琤前朝張氏製自從聽者稀絃絕久不繫  
我有一扶老浙產非邛枝畱得五百年會有化龍時  
我有匣中刀中夜蛟龍吼摩挲再三厲壯心付杯酒  
我有窗外竹時展青鳳翅矯首竚天風便有凌雲意  
我有點酥娘朝雲事和仲庭不種梧桐安能久畱鳳  
我有古明鏡悲愉逐人面吾髮已星星旦復休相見  
我有二曜燈雙炬明自奉牀頭棄短檠長檠亦不用

我有尺幅馬畫手亦堪誇軒昂向紙上疑是滿川花  
我有紫瑤簫手製韻自嬌吹向松陵路知過第幾橋  
我有博山爐晨起炙沈香心如寒爐灰思似爐煙裊  
我有同門友邈若山與河我思君不見君思我若何  
我有一錦機文采雲霞麗試翻花樣看獨得遺山諦

賦得冬山如睡

黯淡冬之日橫陳一角山嵐光當戶斂黛影向人間已  
洗明妝色如傳兀睡顏支離高士榻髮鬢美人鬟但覺  
積唐甚猶疑體素屏煙迷秋帳擁蘿引翠帷鬢冷許雲  
同臥棲招鳥共還何當剪東絹盤礴召荆關

賦得重與細論文

客已乘舟去思緣折簡繁預申他日約重擬一尊論不  
朽文章業難同世俗言解人誰印可作者貴尋源喜有  
同心友遐思異地存但期傾白墮莫厭坐黃昏商榷何  
妨再推敲敢憚煩不知狂學士曾到浣花邨

賦得如水如鏡

大寶箴言在單詞蘊古云稱名兼水鏡取義靖紛紜川  
委資逢廣輪懸象納羣遇風應渙澤擬月不沾雲泓蓄  
千潭影匳開四照紋柔剛神自合黑白本來分爲有澄  
淆候還須拂拭勤何如瞻 黼座 澄鑒澈重垠

賦得棲鳳難爲條

鳳振丹山翮棲難衆樹顛任他條偃蓋只覺翼摩天攬  
德輝方下巢安擇尙延碧梧枝許老翠竹實宜寧噉向  
高岡引翔徒闡苑傳松卑皋鶴舞喬笑谷鷺遷百尺看  
盤鬱三霄自轉旋太常詩句好酬贈記延年

濟寧王生慰祖餉水仙

城南斥鹵不宜木野塘荒草迷秋原故人知我愛嘉樹

雙梅遠寄黃羹盆

吳肯哉自鄂陵寄梅二本

任城復見王允道

山谷有王

允道送水仙詩

侵曉小奚來扣門自言家世本南海合致土物

酬詩魂湘妃許配羅浮邨冰肌雪豔明朝暎巖灘新月

乍出水丹青恹恍愁王孫此花遠從閩嶠來絕少淺土  
培孤根我今流落此相見飄零心蹟難同論所幸體素  
本無垢勺水亦足敷溫磨一朝羣玉照斐几翩如羅幃  
凌波翻我對此花殊脈脈花亦依約愁無言斜欹金釵  
屢回顧低頭勸我傾清尊粗才未造山谷門作詩草草  
聊心存

陶雨亭照

虬枝六尺藤方屋九寸帽人閒無處著仙境忽意造暖  
暖桃花林山川闕靈奧淳古出羲黃眞朴媿熙皞危言  
莊列耳聊此寄孤傲欣然欲規往子驥眞可笑雨亭徵

士裔雅尙宗風邵混蹟長安塵七十忽已到委蛻遊化  
坡快如鴻雪埽令子夷門來示我昔年兒警欵迴不聞  
眉宇猶照耀不作斜川遊重縱武陵權依稀述祖詩幸  
免折腰誚我疑舊雨來君已青蠅弔作詩動四壁颯颯  
悲風嘯

馮訥之出其曾祖昭仙祭酒畫扇索題

西風秋扇久棄捐出入懷袖知誰邊聚頭牛面山一角  
墨痕黯淡畱秋煙司馬見之忽動色知是先曾偶遺墨  
祭酒風流已百年魚蠹蛛絲幾遭蝕璆琳一朝初入手  
宗器裳衣同保守我來讀畫曉窗明過眼雲煙亦非偶



李雲門生子

藍田暖日結瓊英喜見充閭淑氣迎老去何須看鬢影  
坐來爭欲試唳聲一官冷任沈冥久萬卷書應付託成  
一語城翁休誤信公卿近要極聰明

朱西墨由秦中調任大名守余亦有夷門之遊賦  
以奉別

一回相見一回蒼雪影鴻痕各一方老輩畱君如魯殿  
清陰到處有甘棠承恩新喜畿南近宜澤還同渭北長  
我亦梁園成倦羽滋陽雲樹兩相望

偶成

世事升沉未暇論，懸疣早厭一身存。  
書畱糟魄慵開卷，德養支離合閉門。  
棋局到頭空有劫，香爐垂燼不多溫。  
青山已辦西溪下，埋骨他年石可捫。

立春

百年世事等浮煙，如此生涯劇可憐。  
老覺貧交差有味，病思健日太唐捐。  
難將畫筆供晨爨，贏得閒愁廢曉眠。  
見說春回天上信，陽和可到雪山邊。

是日祀竈復賦

欲煩司命叩天關，下有窮黎不自存。  
寶玉已遭陽虎竊，圖書如被祖龍燔。  
神茶空自銘雙戶，檮杌居然萃一門。

卻恐醉神難入告不將清醕注瓶尊

贈姜冶夫

小住虞山麓相逢白石仙  
苔岑同氣誼梅竹見周旋  
冷淡情逾洽支離德自全  
難尋特健藥倘示攝生篇

袁紆亭同年遺照

記曾同日聽霓裳彈指眞如夢一場遺挂忽然成覲面  
不聞鄰笛已悽涼

春明小住廿年餘問字頻過揚子居此後萍蹤了無定  
但憑秋雁問何如

清才天造鎮巖疆北望雲中落日黃比戶絃歌銷悍

氣人言太守有文章

錢□□遊洞庭圖

松陵集裏窺靈境小住經年但默存  
賴有錢郎遺粉本卻如身到隔凡門

金庭玉柱神仙宅炳燭捫蘿倍出奇  
只恐雲雷勤守衛靈威重到亦迷離

戴生有侍姬名蘭卿因借畫索題

畫花已非花況云花似人畫難作花  
看花非人可親竹聲疑珮響幻夢徒  
紛紜我有真實義爲君聊具陳拭我  
黃磁斗貯此湘江嬪灌以石泉水晞  
以扶桑曦供之八

綺窗圍之暝玉屏宴坐狎燕姑鳴琴招文君簪映翠鈿  
鬢香啟朱櫻脣幽蘭與淑姬相看兩不瞋畱香動三日  
閉戶思兼旬此畫且高東共醉拋青春

友人圖香山詩意作行看

繁柯無停颺急湍無停流韶春不幾日颯然知已秋達  
人解其會惜此光景適眄柯結遐想倚樹凝清眸雲濤  
雜松籟相與成颺颺富貴亦復佳浮生同一漚浩歌白  
傅詩千載懷前修五十行且至新霜將盈頭息歎與補  
劖白日空悠悠雅意妙寄託薄浴洵難儔我讀畫初竟  
一言爲君酬儒術節吏治割雞焉用牛量移會起擢擁

節綏雄州譬之太山雲膚寸不可收豈同謝幼輿合置  
壑與邱

友人照

碧天澹無滓涼露秋已夕冰簟八尺強凝滑勝蘄笛恣  
我一寤眠亦足夢莊蝶幽人意頗殊獨往坐磐石且滅  
華軒燭不展虛堂席留影與徘徊笑人自偈仄樹杪振  
商飈泉罅戛鳴玉似扇秋風清散此幽懷積秋來亦復  
佳秋去苦無蹟

以小印贈楊農部

嚴徐庾薛盛簪裾誰信郎潛有著書早讀文章識和仲

老慙名實不相如，名言合當蕞荃佩。香草休嫌掇拾餘，已分陳人嬾懷刺，不辭一造子雲居。

榮夢魚與二友作松桐曉夢圖

昔聞東坡翁二十無朋儕，四海一子由落落寡所諧。筠州感同夢時有二客偕，筠州夢見本集乃知神明契不隔形與

骸。通守亦雅尙，服官夷山隈。同僚得石交，如彼岑附苔。松風啟夕扉，桐雨侵晨階。妙契忘粲可，淨社殊宗雷。聯吟時剪燭，結夢猶銜杯。趣想周蝶化，牀口上下猜。清圖旣獨寫，雅抱還同開。區區講聲氣，未俗真浮埃。

文翁照

別駕文君心芳之尊甫也

上徵耆舊陳圖見古歡雄談晉王猛新論漢桓寬涉  
世春生脚逢人井不瀾懷才空老去品望重琅玕  
地饒鹽筴利江北著雄州借箸資宏略調膈茂遠猷誠  
還通婦孺道自重諸侯他日驛旰表奚須史筆留

杜老蒼茫意孤雲太古春不須僮接杖惟有影隨身德  
養支離外居將木石鄰祇餘詩禮在卻待過庭人

照名  
獨立

圖  
騷子今通守夷門乍縮符殷勤潮家世鄭重出儀圖此  
日瞻遺挂眞如接履絢停雲天末迴吟睇獨縈紆

夏廣文照

湘潭人



先生高致近無雙  
百斛龍文力可扛  
我不識君從想像  
軒然眉宇照湘江

太守銘詞實不浮  
越禽胡馬紀豪遊  
千秋好儷龍門史

靈氣都從筆下收  
宋太守本敬作墓志  
極言其足蹟之遠

一官休笑廣文寒  
胸次都憑眼界寬  
豈似尋常餐苜蓿  
徒移明月影團團

生寄天涯死便埋  
羅浮蝶化亦何哀  
卻煩景宋招魂手

遠向梅花嶺外來  
君遊歷最廣晚遊粵  
東歿於館舍原志銘

友人餽黃河水

大梁城外大河橫  
源發昆侖萬里程  
挹彼過于求趙璧

分甘珍似賜金莖竹符遠遣奚奴遞石鼎頻添活火烹  
正是穀前初焙候龍泓誰寄綠雲英

陳夢廬以詩見投兼惠筆墨依韻奉答

陳侯胸貯才幾斗左揖誠齋右石帚麤材望塵應卻走  
孔璋畫虎竟成狗須知彘鼎異壺甌不向形模論妍醜  
惟君夙抱冰雪文豫章昨看南浦雲竭來徑蹋梁汴垠  
贈我新什百琲珍紛綸不數井大春無已閉門安足云  
知吾無計逃炎暑子墨管城相鼓舞殷勤遣使重致語  
健筆淋漓轉媚嫵君詩壁壘何險勁赤幟相當冒吾許  
以淡巴菰命題課諸生率賦示之

太西傳異種樹藝偏中華縷切金絲細名稱肉果嘉疏  
肝功竝桂滌胃力勝茶尙有仁頻子還應伯仲誇仁頻  
檳榔

也  
味從無味得香在衆香先噓吸通靈府咀含引玉泉莫  
囊同結佩筠管競流涎道是相思草眞難一日捐

似吐仙人火疑飄楚岫雲迴風成縹緲隔座轉氤氳甘  
醴羞隨俗森嚴自不羣正如交益友苦口有餘芬

破寂頻招汝抽妍慣起予賓僚時競進獨坐亦相於布

種依桑陰

江浙植煙多在桑樹之下

探原核露書

煙始見於姚旅露書

何當召

農叟非種願芟鋤

煙利過禾黍故植之者多而荒田功矣

齋中蜀葵盛開賦示諸生

人是羈孤客花眞耐久朋繁英雲日麗宿梗雪霜凌空  
抱傾陽志疇憐衛足能巡檐頻琢句幽興託溪藤

十畝蕭閑地多因斥鹵荒

院中土劣不宜樹

種桃難問歲插柳

不成行

余植桃一株柳十本皆枯死

獨有阿儂質無須灌溉方庭除

一流晒蕉萃當姬姜

種自三川遠戎葵舊得名詞誇鮑昭賦豔濯錦江明露  
潤柔條裊風羸勁葉撐清齋無長物拔取佐新秔  
步障層層錦光明鬪米囊連畦疑菜把接葉伴書堂夏  
奪丹榴日秋分野菊霜若將花較壽疇似此君長

畫馬雜詩

平生賞駿略同支偶借丹青一寫之瘦骨騰來猶帶傲  
雄心銷盡不知疲嬾從松雪求藍本留待坡仙賦好詩  
惆悵一生陪冗仗九方相遇定何時

良馬自來悲伏櫪美人從古怨長門尋常寫入丹青裏

一例能銷烈士魂

圖一仕女倚柳樹下一馬在旁

支公愛馬不愛色日對驊駟賞英特陳王好色不好馬  
洛濱惆悵驚鴻蹟空羣傾國本殊衆熊魚欲兼那可得  
多情千古楚重腫垓下重圍兵刃迫雖不逝兮虞奈何  
楚歌四起難爲別英雄天賦有柔腸漢王但解傾人國

朝來我讀龍門史百感茫茫盪胸臆濁酒頻澆不易平  
聊把深情寄煙墨九方難遇登徒多美人良馬將如何  
可憐誰買長門賦無復人傳天馬歌

又一幅

退朝不獨侍臣閒天廡龍媒也自便試問錦韉陪羽獵  
何如散步飲流泉

清溪飲馬一  
奚官隨之

相彼馬矣言陟崔嵬非常顧視日霽天開君子似之翔  
步雲臺保貴之道高而不危

高山立  
馬圖

### 哭第六女

塵世情緣有短長短時眞足刺人腸風摧敗葉諸郎逝  
燈暗幽窗弱女亡硯北不聞頻問字佛前無復密燒香

相攸我恨蹉跎甚眼底難逢玉潤郎

每隨姊妹晚燈前婉順承顏曲意先料理米鹽分母力  
慣拋刀尺向芸編先期早辦還鄉計短命偏逢厄閏年  
惆悵新衣疇曳婁拚將一炬付重泉

畫蘭

不遠於人不媿人空山狼籍十分春若從儔類論流品  
夷惠中間著此身

又一幅

樵斧聲中閱幾春雲霞常護自由身無端識得東風面  
偷出香來帶累人

菩薩蠻

金甌豔捧佳人手紅桃香遞才人口奇遇古來多方滋  
又若何 相思無限苦明月期三五夜靜寂無人候門  
枉自深

道光壬午重宴鹿鳴蒙 恩晉秩恭紀

微生竽濫黠 明光襍被歸來鬢已霜早信山中穹是  
谷漫矜天上玉爲堂槐陰夢斷重占夢桂窟香飄又染  
香昨見 綸音來日下里閩指說話偏長

歲月峻嶒馬齒強江湖魏闕兩相忘 恩加清秩還初

服集以讀學考降今典舉鄉闈率舊章自丁卯山舟先生重宴後至今



重著朝衫身覺重追思舊事意微茫同林尙有鷓鷯翼

早學晨風遠自翔

同榜潘榕皋員外今改入江省

紀事清吟湖不翁幹才接武後先同

山舟先生時年八十有五重宴鹿鳴

集齒亦同

聲華合讓前修嫩閱歷還疑大造公珥筆也曾推

舊史乘軺亦復借郵驄今朝往事難追憶心蹟依然類  
轉蓬

雨露

三朝

聖化醲微臣沐浴最無窮編摩

未盡三長力校覆慚無七略功廩祿虛糜多歲月甄陶  
深荷有蒼穹 五雲曉護 蓬萊闕虔炙心香遠欲通

生日作

我後東坡一日生宮蹙磨竭漫相衡文章汗漫頻遭黜  
身世飄零意不驚春夢何須煩指點西風一任勢縱橫  
希蹤前哲吾何敢喜有餘齡際太平

宜春帖子詞

吉利吉利筆墨遊戲新歲新春百事如意

吉利當頭萬事足人入新年納新福几上平安春色濃  
梅花茶花香馥馥

靈巖懷古

娃館依稀指石根吳宮往事不堪論山川終古行人路  
絲竹千年故國魂香徑猶來飛燕舞寒江空使怒蛟奔

西風莫雨聲何急  
一片還朝破楚門